

Vom Himmel hoch da komm ich her
ich bring Euch gute neue Mär
der guten Mär bring ich soviel
davon ich singn und sagen will

Liebi Fründine und Fründ vo der Griene Amsle

Vom Himmel hoch isch sy koo - unseri neuu Brau-Aalag
Aendi Novämber! Und doodermit isch d Aväntszyt fir
die Grieni Amsle z Aend gange!

Advent - latinisch Adventus - heisst Aakunft ! - für alli
andere Lüt isch d Aväntszyt im Dezämber
will mir as Fründine und Fründe vo der Griene Amsle
und au as Mitglieder vom Förderverein ebe nit sin wie
alli andere het fir uns d Aväntszyt scho im Friehlig
aagfange und isch jetzt aendi Novämber z aend gange!.

Für der Vereinsvorstand und mi as Präsidänt - aber
bsunders fir der Martin und der Andreas ischs e Zyt gsi
wo me sich zwor immer voller Hoffnig uf der grossi
Daag vorbereitet und gfreut het - und trotzdem -
"Oo du Fröhliche" isch vyilfach vo "Stille Nacht"
abgleest worde. Unseri Sitzige sin mee as aimool
vo "in stillem Schweigen sinked" prägt gsi um by de
Wiehnachtslieder zblyibe!

Und hüt - jä hüt - fyire mir mit däm Adväntsfescht d
Inbetriibnaam vo däre Brau-Aalag wo uns so lang
beschäftigt het. Mir hän im woorsche Sinn vom Wort

miesse e Durschtstreggi iberstoo. Was gits verüggters als wenn me in der aigene Beiz mit ere aigene Brauerei kai aiges Bier me het.

Verüggters gits aigentlig nume wenn me fremds Bier muess zuekaufe - das in der aigene Beiz uusschänggt und mes au no guet findet.

Und jetzt - jetzt goot die Durschtstreggi z Aend und uf der Websyte het me kenne läse as es in der neie Aalaag scho freelig - blubberet - "Oo Du Frööliche" - ka ych doo nur sage!

Natyrlig het d Brau-Aalaag scho am maischte Furore -innerhalb vomene Reihe an Projäggt - gmacht. Das umso mee as Rieche jetzt au zumene aigenene Flugtag koo isch. Das git mir au s Stichwort zum Umstand as die Investition wo der Martin Schultheiss fir d Huusbrauerei vo der Griene Amsle gmacht het au fir d Gmeind Rieche vo Bedytig isch.

Es git nit mängi Gmeind wo sich riehme ka e Lokalbrauerei vor Ort zha und soogsee muess unser Amsel-Bräu als Riechemer-Bier au vo däre Syte gschätzt wärde.

E wyters Projäggt - wo au mee as zur Zufriidehait Aaloss git und pinggtlig ferig worde isch - sin die neije Fläsche.

Jetzt ganz im Trend - wiiderverwändbar und entsprächend Roostoffschonend. Neu mit 3,3 dl Inhalt und eso hoffentlig au fir Dame und beschaideneri Schluggsprächte passend. Abgstandes Bier isch nyt feyns, mit däre Füllmängi versorge mir unserri Kunde immer mit frischem Bier - ebe Amsel-Qualität!
Die farbige Verschlüss hälfe d Biersorte aifach z indentifiziere - me ka jetzt e Six-Pägg roti, blauu oder aini

vo de andere Farbe verlange. Das isch fir alli wo d Nämme vom Gebräu nit kenne bhalte bsunders praggtisch.

Hän Iir der neuu Uufdritt in der Wärbig scho gsee? Uf de Bierdeggel wo me mache loo het. Uf de Flyer wo guet präsentiere was es in der Griene Amsle alles Neus git? Au do isch grossartigi Arbet glaischtet worde. Und all das isch uf der Homepage - uf der neue Website zsgsee - au die Homepage isch e grossartigs informativs Medium worde. Es loont sich die Website immer wiider uufzriefe - in kurze Abständ wird druf immer mitdailt was es in der Griene Amsle und iirem Umfäld so lauft - vyil Vergniege bim läse!

Für der Verain, sy Vorstand und fir d Mitgליeder, isch hit e gschichtsträchtige Daag koo - wo fir uns alli e grossi Heruusforderig bedytet - und glychzytig au Aasporn sy muess uns fir die Griene Amsle und d Huusbrauerei yizsetze und sy in Zuekunft no erfolgrycher z mache.

Wär sich jetzt frogt - "jä was isch denn mit em Wiehnachtsgschängg wo me uns an an der letschte GV versproche het?". April - April - nainai - au das hän mir nit vergässe. Und - was ha-n-y am Aafang gsait - mir sin halt aifach anderscht as anderi und wägedäm bykemme alli unseri Mitgליeder s Wiehnachtsgschängg erscht im neje Joor. Am erschte April hän Iir sicher alli s Gschängg. D Skeptiker hän jetzt scho wiider iiri Zwyyfel ob doo wirgglig ebbis druus wird. Ych sag nume - versproche isch versproche - am erschte April isch ibrigens au unseri näggschti GV und au das isch kai Aprilscherz! Mergget Euch das Datum scho emool!

Zum Schluss blybt mir nur no Danggscheen zsage. Vyili Hälfer hän sich näbe-n- em Martin und em Andreas Schultheiss yigsetzt e gueti Basis für die Grieni Amsle z schaffe und au für der Förderverein e erfolrychi Zuekunft sicherzstelle. Härzlige Dangg allne fir iiri Arbet!

Mir hän mit der neje Bau-Aalag e grossartigis Wiehnachtsgschängg bykoo - in däm Sinn winsch ych uns allne scheeni und frööliche Wiehnacht und beshti Gsundheit, vyil Glück und Erfolg im Neje Joor.

Härzlige Dangg!
Amsle110